

(1) Chitema rudzii chekutanga chiri kubuditswa muvhesi iri uye chinonyanya kushatirisa pamberi paMwari?

Zvirevo 8:13

Mwari haaoni zvitema zvose zvakaenzana. Pane mwero yakasiyana yehuiipi pamberi paKe. Vazhinji vedu izvi tinozvionawo asi nemhosva yechimiro chedu chechitema, maonero edu haana kunyatsoperera uyewo haana kururama. Mwari ndiye anonyatsoona zvinhu zvose sezvazviri. Zvinokosha kuziva kuti zvisinei kuti munhu aita chakaipa chidiki zvakadii mumaziso evanhu, hapana chitema chidiki pamberi paMwari. Zvakazaurwa 20:12.

Mukutonga nekuona kwemunhu kusina kunyatsoperera, chidhakwa chinobatwa neseri kweruoko chichiudzwa kuti chitema chacho chichatadzisa kupinda denga; asi kuzvida, chindini nemakaro (kuruta / mbayo) zvichionekwa sezvisina basa. Izvi zvitema zvinodenha Mwari zvikuru nekuti zvinopikisana netsiye nyoro dzechimiro chake uye rudo rwake rusina chindini. Patinowira mukati mezvimwe zvitema zvikuru tinonzwa kunyara nekushushikana nekunzwa tichida nyasha dzaJesu, asi chitema chekuzvida hachisvitsi munhu pakunzwa achifanira kuva naJesu muupenyu hwake asi kuzvida kunochengeta mwoyo wakavharwa kubva kuna Kristu.

(2) Munamato wedu unobva pasi pemwoyo unofanira kuva wakadii?

Ruka18:13

Muteresi mutadzi akanamata munamato uyu akaona chimiro chake chechitema, vamwe vaimutarisa vachimuonawo nenzira iyoyo. Musiyano pakati pake nemuFarise waiva wekuti muFarise akanga asingaoni chikonzero chaangatsvagira kuregererwa. Akaremerwa nemutoro wake wezvitema uye nekunyara, muteresi akauya pamberi paMwari achikumbira tsitsi dzaKe. Mwoyo wake wakanga wakazaruka kuti Mweya waMwari umunusungure kubva kusimba rechitema.

Munamato wemuFarise aizvinzwa akarurama unoratidza kuti akanga asinganzwi chikonzero chekuda kuregererwa. Izvi zvinoratidza kuti mwoyo wake wakanga usina kugadzirira kuterera Mweya Mutsvene. Nokuti aiva kure naMwari zvakadaro haaigona kuenzanisa kuva mutadzi kwake nekuperera nehutsvene hunoyera hwaMwari. Achienzaniswa nemuteresi iye pachake haana kumboona chikonzero chekuda shanduko, saka haanawo chaakagamuchira.

(3) Tinogona kuzviita vatsvene here nekuedza pese patinogona napo nesimba redu tega?

Johane 15:5

Kana taona kutadza kwedu, hatifaniri kumirira tichifunga kuti tinofanira kutanga tazviita vari nani. Kune vazhinji vanofunga kuti havasati vanaka zvekuti vauye kuna Kristu. Vanofunga kuti vanofanira kutanga vave nani kuburikidza nesimba ravo. Chokwadi chiripo ndechekuti hatina tarisiro yekukunda chitema tiri tega. Jeremia 13:23. Hatifaniri kumirira mukana uri nani kana kuzvinzwa tave nani, kana kurega mafungiro edu achitidzivirira kuenda kuna Jesu. Tinofanira kuuya kuna Jesu sezvatiri nekukumbira simba raMwari kuti ritibatsire kushanduka.

(4) Chitema chinoita sei munhu anga akarurama kana akadzokera mumashure kubva kuna Mwari?



Ezekieri 18:24

Kune vamwe vanomboti vasarudza ruponeso, vambofamba munzira yokururama, vosarudzazve kudzokera kunyika. Vanhu ava havafaniri kuzvinyengedza vachifunga kuti Mwari mutsitsi dzake huru nenyasha Achangovaponesa ivo vachifuratira havo nyasha dzake.

Udzamu hwehuipi hwechitema hunogona bedzi kunyatsoonekwa kana zvichienzaniswa neizvo Jesu akatiitira pamuchinjiko. Kana vanhu vachitaura kuti Mwari akanaka zvakadaro zvekuti haagoni kuramba mutadzi, ngavatarise kuKarivhari. Kwakanga kusina imwe nzirazve yataigona kuponeswa nayo. Pasina kuzvipira uku kwakanga kusina imwe nzira yekubuda nayo kubva musimba rekuparadza rechitema. Izvi zvinotiratidza kuti hakuna imwe nzira yekubva nayo musimba rekuparadza rechitema kunze kwenyasha dzaJesu. Zvinotiratidza kuti tariro yedu yehupenyu huri nani inowanikwa chete mukugara maari. 1 Johane 5:12.

(5) Tinofanira kurarama nemuenzaniso waani?

1 Petro 2:21

Vazhinji vanoramba Ishe vanozvinatsurudza mukusanamata kwavo nekutaura zvinoteera pamusoro pemaKristu! “Takangoenzana. Havana kuzviramba kwavanako, havazvidzori uye pamaitiro avo hatina chatakambonyanya kusiyana. Vanodawo mafaro enyika nekungozvinakirwawo sezvandinongoitawo ini.” Mukutaura kwakadai vanoshandisa kutadza kwevamwe sechikonzero chekurega kuita zvavanofanirwa kuita. Asi zvitema nekutadza kwevamwe vanhu hazvina vazvinoregerera. Ishe haana kutipa mienzaniso yakaipa yevamwe kuti tiiteedzere. Mwanakomana waMwari asina chaangapomerwa ndiye watakapiwa semuenzaniso wedu, saka avo vanonyunyuta pamusoro pesarudzo dzakaipa dzinoitwa neavo vanozviti maKristu, ndivo vanofanira kurarama hupenyu huri nani nekuve muenzaniso wakanaka. Kana vachinyatsotenda zvinesimba kuti vanoziva zvinofanira kuitwa nemuKristu, chitema chavo ivo hachina kunyanya kukura here? Vanoziva zvakanaka zvavanofanira kuita asi voramba kuzviita.

(6) Zvakakosha zvakadii kuti tiyedze kuchengetedza mwoyo yedu yakachena?

Zvirevo 16:9

Ngwarira nyaya yekuverengera (yekuti ndichati ndoita). Usaramba uchiverengera nyaya yekuregera zvivi zvako. Nerubatsiro rwaJesu tsvaga mwoyo wakachena. Ipapa ndipo pakatadzirira zviuru nezviuru zvevanhu kuita sarudzo izvo zvakazotungamirira mukurasikirwa kusingaperi. Patinoramba kugamuchira kuteterera (kugombedzera) kweMweya Mutsvene waMwari, tiri kuita chitema. Hazvinei kuti chitema chingaratidzike sechidiki zvakadii , chinogona kungotivaraidza chete asi tichirasikirwa neupenyu usingaperi. Zvitema zvatisingakundi zvinozopedzisira zvatikunda isu uye zvokonzera kuti tiparadzwe.

Mukuita chinhu chiduku chakaita sekungodya muchero wavakanga varambidzwa, Adama naEva vakazvinyengedza vachifunga kuti hapana chinhu chakaipa chaizovawira sezvakanga zvataurwa naMwari. Mukuita chinhu ichi chavaiona sechidiki vakanga vachitotyora mutemo mutsvene waMwari usingashanduki. Izvi zvakazarura masuwo erufu nokutambura panyika yedu. Kubva nguva iyoyo mupasi rino kwakatanga kusimuka kuchema kwekurwadziwa, uye zvisikwa zvose zvinogomera nokutambudzika pamwe chete mukurwadziwa nemhaka yekusateerera. Denga pacharo rakatobatwabatwawo nematuso (mubairo) ekupandukira Mwari akaitwa nemunhu. Zvakaitika paKarivhari chirangaridzo chekuzvipira kunoshamisa uko kwakaitwa kuti kuripe kutyorwa kwakaitwa mutemo mutsvene waMwari. Hatitombofaniri hedu kana nekumbofunga pamusoro pechitema sechinhu chidiki.

(7) Chiiko mubairo wekusarudza kurambira pachitema chatinoziva muhupenyu hwedu?

Zvirevo 5:22

Pese patinotadza, pese patisingagamuchiri nyasha dzaKristu tichifuratira tiri kutozvikanganisira. Kuita uku kunoomesa mwoyo yedu, zvinorukutisa simba riri matiri rekuita sarudzo,zvigotitadzisawo zve kunzwisisa. Zvinotipa kusindimara (kuomesa mwoyo) uye kutitadzisa kunzwa kugombedzera kune hunyoro kweMweya waMwari.

Vazhinji varikunyaradza pfungwa dzavo dziri pakutambudzika nepfungwa yekuti vanogona kungoregedza tsika yechitema yavakajairira kana vavakungoda havo. Vanofunga kuti vanogona kungoramba vachingotamba nerukoko rwenyasha, uye vachifunga kuti vanogona kungoramba vachishanyirwa neMweya Mutsvene nguva nenguva.Vanofunga kuti mumashure mekufuratira Mweya wenyasha uye vachipa Satani kuti avatonge vanogona kuzongoshandura nzira dzavo panguva yavanenge vawirwa nedambudziko guru.Havanzwisisi kuti izvi hazvisi nyore kuita.Zvavakararama mukati mazvo, uye dzidzo yavakapfuura nemukati mayo kweupenyu hwese yakaumba zvimiro zvavo zvakaoma zvakadaro zvekuti havasi vazhinji vavo vangazoda kuti vashandurwe zvimiro zvavo zvifanane naJesu.

Kunyange tsika imwe yatingarera muzvimiro zvedu, kana chidiso chimwe chete chechitema, kana chikarerwa, mukufamba kwenguva chinotsvaira zvachose pfungwa yevhangeri mumwoyo yedu. Mafaro ese echitema anosimbisa matiri mweya wokupandukira Mwari. Munhu anoratidza mweya wakasimba wokusindimara mukusatenda (kusadaira) kana wekushaiwa hanya nechokwadi chedenga achakohwa mubairo wesarudzo dzake. MuBhaibheri rose hamuna yambiro inotyisa kupfuura iyo yakapihwa naSoromoni pamusoro pekutamba nezvakaipa, mumazwi ake anoti, mutadzi “uchabatwa namabote ezvivi zvake.” Zvirevo 5: 22.

(8) Tinofanira kugamuchira riini rukoko rweruponeso?

2 Vakorinte 6:2

Kristu anogara akagadzirira kutisunungura kubva muchitema asi haatimanikidzi. Kuburikidza nekuramba tichitadza sarudzo dzedu dzinoramba dzakanangana nekuita zvakaipa, kana tisingadi kusunungurwa, kana tisingadi kugamuchira nyasha dzaKe, chii chimwe chaAngaita? Tinenge tazviunzira kuparadzwa kuburikidza nekusarudza kuramba rudo rwake. Rukoko rwake runotsvaka kuti tikurumidze kumugamuchira. VaHeberu 3:7, 8.

(9) Sei zvichikosha kuti mwoyo yedu icheneswe?

1 Samueri 16:7

Mwari anoziva zvinosunda mwoyo yevanhu. Anoziva kurwisana kwerufaro nekusuwa, kusagadzikana nekushaya hanya. Anoziva mwoyo wakazara nekusachena uye nekunyengera. Anoziva chinangwa chawo, zvaunoreva nezvawakananga. 1Samueri 16:7. Enda kwaAri nemwoyo wako une madzvanga echitema sezvauri. SaDavidi munyori weMapisarema, zarura mwoyo wako kuziso raMwari rinoona zvose uti, “Ndinzverei Mwari,muzive mwoyo wangu; Ndiidzei, muzive ndangariro dzangu; Mutarire kana pane nzira yakaipa mandiri, Mundifambise munzira isingaperi. Mapisarema 139:23, 24.

Vanhu vazhinji vanongogamuchira chinamato mupfungwa dzavo, asi unongova mufananidzo wokunamata Mwari mwoyo usina kucheneswa. Munamato wedu unofanira kuva, “Sikai mandiri mwoyo wakachena, Mwari; Vandudzai mukati mangu mweya wakarurama.”Mapisarema 51:10. Zvitaurire chokwadi mukati memwoyo wako. Vavarira kuisa simba rako rose sezvo nyaya iyi iri yeupenu nerufu. Inyaya inofanira kugadziriswa pakati pemwoyo wako naMwari, ibva yagadziriswa nekusingaperi. Kufunga kuti ungaponeswe usina kuita izvi zvinongokugumisira mukuraswa.

(10) Saka ndezvipi zvatinofanira kuteedzera?

VaHeberu 12:14

Dzidza shoko raMwari uine munamato mumwoyo. Shoko raKe rinotiratidza nzira inokosha yekuva vatsvene. Mararamiro makuru aya anoratidzwa mumurairo waMwari uye muupenyu hwaKristu uye kuti pasina izvi, “hapana achaona Mwari.” Murairo waMwari uyu neupenyu hwaKristu zvinotizivisa pamusoro pezvivi nekutiratidza pachena nzira yekuti tiponeswe nayo. Terera uye teera izwi raMwari riri kutaura kumwoyo wako.

(11) Saka Mwari anotsvaga kuti tidii?

2 Vakorinte 5:19

Apo unoona uipi hwechitema uye uchizviona iwe pachako sezvauri, usakuhunike, usarasikirwe netariro. Kristu akavinga vatadzi vakadaro. Hazvitsvagi kunyengetedza Mwari kuti auye kudivi redu, asi nemhaka yerudo rwaKe runoshamisa, Mwari muna Jesu “Ari kuyanana nyika naye.” Ari kunyengerera mwoyo yevana vake vakarasika nerudo rwakadzama nehunyoru hwakakurisisa. Hakuna mubereki pasi pano anogona kutiwira kunyangadza kwevana sezvinoita Mwari kune mumwe nemumwe wedu waari kuyedza kuponesa. Hapana anogona kuteterera neunyoru saMwari munhu anenge

asarudza kuita zvakaipa. Hapana miromo yatiyambonyengerera zvine unyoru ichipa ruponeso kune uyo akarasika sezvinoitwa naMwari. Zvese zvaanotivimbisa nezvaanoti yambira zvinotiratidza rudo rusingagonikutsanangurwa.

(12) Jesu akauya kuzoponesa ani?

1 Timotio 1:15

Apo Satani anouya kuzokutaurira kuti uri mutadzi mukuru, iwe tarisa, kune Uyo akakudzikinura utaure pamusoro pekunaka nekugona kwakaperera kwaKe. Chichakubatsira iwe, kutarisa kuchiedza chaKe. Bvuma chitema chako, asi taurira muvengi kuti, “Kristu Jesu akauya panyika kuzoponesa vatadzi” uye kuti iwe unoponeswa nerudo rwaKe rusingagoni kuyenzaniswa. 1 Timotio 1:15; Johane 3:17.

(13) Ndivanaani avo vanozonyanya kuda Mwari zvakanyanya?

Ruka 7:43

Jesu akabvunza Simoni mubvunzo pamusoro pevanhu vaviri vaiva nezvikwereti. Umwe aiva nechikwereti chemari shoma shoma umwe chemari yakawanda chose, asi akavaregerera vose. Kristu akabvunza Simoni kuti ndeupi ainganyanya kuda Ishe wake zvakanyanya? Simoni akapindura, “Uyo aiva nechikwereti chemari zhinji.” Takanga tiri vatadzi vakuru, asi Kristu akatifira kuti tiregererwe. Avo vaakaregerera zvikuru vachanyanya kumuda. Vachanyanya kuswedera pedyo nechigaro chake kuti vamurumbidze nerudo rwaKe rukuru nekuzvipira kwake kusina chipimo. Patinonyanya kuziva rudo rwaMwari ndipowo patinosvika pakunzwisisa kusakadza nekusabatsira kwechitema. Patinoona kureba kwengetani iyo yakadzikiswa kuti tiibate, tinotanga kunzwisisa pamusoro pekuzvipira kukuru kwatakaitirwa naKristu, uye mwoyo yedu inonyunguditswa neunyoru uye nekunyara.

Pandinoswedera pedyo naMuponesi ndinoona kururama kwaKe.Izvi zvinondiita kuti ndione kuti upenyu hwangu nechimiro zvakazara netsvina uye handisi mutsvene. Chidiso changu kuti ndifanane naYe.

Tenderedza: Hongu Kwete Handisati ndasarudza

Ndinonzwisisa kuti kutendeuka kusuwa kwechokwadi pamusoro pechitema kwete kungotya kurangwa kunounzwa nechitema chacho.

Tenderedza: Hongu Kwete Handisati ndasarudza

Ndinotenda Jesu nechipo chekutendeuka chaaisa mumwoyo mangu, uye Ndaita sarudzo yekugamuchira kutendeuka uku.

Tenderedza: Hongu Kwete Handisati ndasarudza

(C) Merlin Beerman - www.revelationpublications.com
Illustrations (C) Goodsalt - www.goodsalt.com
These materials may be photocopied and shared but not altered or sold.

Printed in USA by Light Bearer’s Ministry - www.lbm.org

Matsiko Kuna Kristu



Kubvuma Kutadza Kwedu - 2